

YAKOBO Kukue Ko Yakobo Lɛwɔni

¹ Mɔ, Yakobo, wɛ ni Onanto ku Bonamute Yesu Kristo eto uyifoyifo nɛ mi Onanto eto betidi ba kenke disensɛ bankpo lɛ kawunsiɛ eto akpa nyamɛ kenke busiɛsɛ.

Binyɛ Disuɛyuɛ Lɛ Bulɛ Lɛ Mi Butu.

² Mɔ bayimi, binyɛ disuɛyuɛ lɛ bulɛ kpɛ lete, lete lɛ mi butu. ³ Itsyise biyi biɛnkɛ lɛ bulɛ lɛ mi butu nya mi bofokanɔ dɪtɛ befo buɲyɛ lɛ mu kɛnyɛɛ, nyamfo ebutɛ biofo buɲyɛ keklege lɛ bulɛ saa eto kɛnyɛ. ⁴ Bitɛ lɛ mi bofo buɲyɛ keklege disimɛntɛmɛntɛ, lɛ ekpa mi ɛyenko bɛ lɛ bɛflɔ belo kenke, bɛ kulesa saa ensiebofe itɛ mi. ⁵ Fɛɛ lɛ mi nti eto utsyuɛ ebu dɪmamflɔ lɛ kobetete ɛsuɛ, ɔtɔ Onanto nya wuufi utɛ wɛ, itsyise Onanto eefi asa kɛtɛ utidi saa kafo faa lɛ kafoɛkpɛ ɛsuɛ. ⁶ Fɛɛ lɛ alɛ ola boto katɔ wɛ lesatsyuɛ, ele bɛ fo wɛ anɔ fɛ wuutɛ fɛ lesa nɛ mɛ, manyaki wɛ. Itsyise utidi wɛ kayakii, uyifo fe lekpo eto utuwa ufiebi laasɔ ketsyi katsyilamako. ⁷⁻⁸ Utidi wɛ nte nko, mi mba eto nsusu lafloma mlɛ mlɛ lɛ lesa nɛ ɔnlɛ buyifo ɛsuɛ, membu nkɛ wofo kulesa utsyiko lɛ Bonamute ɔflɔ.

⁹ Lɛ Onanto abesɛ ɔyimi okombo wɛ ni ofokanɔnyɛ katoo, ele bɛ unyɛ disuɛyuɛ. ¹⁰ Nko ke ini itɛ otabinyɛ wɛ ni ofokanɔnyɛ nɛ, bɛ lɛ Onanto ɛbokosɛ wɛ kasɔɔ, ele bɛ unyɛ disuɛyuɛ. Itsyise otabinyɛ eto nkɛ ebubɛ bofe fe kase

efukpokpo laalo læ ofa æsuæ kakpo læ kasɔ. ¹¹ Læ kofe ato kobe kɛnyɛ keklegee, koafa kakpo læ sefa eto esi æsuæ, itæ efukpokpo nyamæ aylɔbe, kaalo kakpo læ kasɔ nya katsylɔ. Nko ke ini itæ otabinyæ tsya wæ lookakplatsya læ wæ keyifoyifo æsuæ keklege fɛ ubæ ukpæ nɛ.

¹² Onanto ebokpo atsyɔ nwæ ke lékpe utu únyæ keklege læ botokabe æsuæ nya útækæ bulæ nye kabua kamæ kato. Itsyise eyɛ læ nnya æsuæ wuunyæ kayofofɔ ka nkpe, ini bo Onanto luufi utæ mba laala wæ. ¹³ Læ utsyuæ edufæ læ botokabe æsuæ, wantɛyi nkæ Onanto ɔflɔ itsyi. Itsyise kulesa embofo Onanto boto kabe læ uyifo lebuæ, nya wæ tsya emfi lebuæ kanto kuutsyuæ kabe.

¹⁴ Bomu utidi eto æsuæ eto sinæ eto alasaa, nnya laawɛ wæ kænæ wæ kakpe læ botokabe æsuæ nɛ.

¹⁵ Nya læ æsuæ eto sinæ eto alasa nyamfo alɛ kafo, kaale lebuayifoyifo. Nya læ lebuayifoyifo nɛmæ abee, diale ukpe. ¹⁶ Mɔ bayimi, biântæ læ kutsyuæ saa læ ɔwɛ mi okpe.

¹⁷ Asa sɛɛ nnya nkpe bo kenke ku ætæsa nnya læflɔ kenke boænyæ, etsyi Boanto Onanto wæ díyifo kato eto ænyælesa ɔflɔ. Nya woamfloma kakpe ketuntu fɛ kase úyifo kofe ku kofande leeyifo. ¹⁸ Onato áyɛ læ wæ kosate eto lelabi æsuæ, nya úlækæ bo eyɛ læ wæ ɔnukualetiki æsuæ bæ læ budi betutɛ læ wæ asayifoyifo kenke nti.

Ele Bæ Bikeyifo Læ Bonamute Eto Ditiki Æsuæ.

¹⁹ Mɔ bayimi lala, bekloma læ bitækæ ænæ nyamfo æsuæ. Bekɔse læ bitsyue ato mlæ læ utsyuæ læ etiki budi, fɛɛ bitsyæsuæ læ etikididi ku ɔblɔnyenyæ mlæ mlæ æsuæ. ²⁰ Itsyise ɔblɔ æntæ

utidi leeyifo kasεε ka Onanto laala nkə uyifo. ²¹ Nyaso biləkə ani bitsyiko lə asinsa saa yifoyifo ku nkpə bua saa eto okle busiə əsuə. Bebokosə əsuə kasə bitə Onanto bə lə befo wə ditiki nə ókpe mi lə akəsisi, nnya ni loofu utə mi lə nkpə nε.

²² Bianwε mi əsuə biə bεlε Ditiki Sεε nəmə bɔnɔ ete, bomu bifi ni bekpε lə mi eyifosa əsuə.

²³⁻²⁴ Itsyise nwə laanɔ Ditiki Sεε nəmə ete fε weenyifo lə ni əsuəə, akate ko utidi wə lənyə wə əsuə lə ahuhɔε əsuə kənyə kase unte. Fεε lə kokpa ləkələkə kedu mfo koo, woatasuə kase unte. ²⁵ Fεε nwə leebu disilə lə kɔfi ko lɛflɔ kɔətə utidi ləsiə lə wə əsuə əsuəə, nya woalε ola keyifo lə ko əsuə inni bɔnɔ te waanɔ koo, Onanto ebokpo wə atsyɔ lə lesa saa nə weeyifo əsuə.

²⁶ Lə utsyuə eebu nkə nwə leesumu Onanto uni, fε woanlε wə odiakami ola lə etikididi əsuəə, ɔwε əsuə nya wə kesumu əmbə kutəkə saa.

²⁷ Kesumu ka nyε lə kusu əsuə, ka Boanto Onanto lənyə nkə kakpa nya botakebu saa ləmbə lə muu, ni mbo mfo nε bə, balε bakɔbɛbi ku bakɔbəsiə ba nlε kanyi bunyə ola, nya lə balε əsuə ola, bələkə əsuə betsyiko lə kawunsia eto abuayifoyifo əsuə.

2

Biankpe Kabakefe Lə Betidi Nti.

¹ Mɔ bayimi, fe mba lefo Bonamute Yesu Kristo, wə nwə ni Diyənde eto Onamute bɛnɔɔ, yanle bə bikabe betidi eto ənəmi ku mə nyənkɔɔ, bikeyifo asa. ² Boefi boə betidi inuə bətsyuə əbə mi katsyakɔ. ɔni eyifo ɔkplenyə wə nti kafia kplε

ka lefo koya nya onkpe sika sia eto lesukpe læ lenimi, nya unuæfæ wæ ni okombo nti lefianku. ³ Békpasæ ənæmi bitæ ɔkplenyæ æmæ nya béfo wæ ku dibu, beteyi wæ biænkæ, “Nlæ fæ lekprakpa, bæ æsiæ læ kakplekɔ mfo.” Nya beteyi okombo æmæ biækæ, “Fæə ñyæ mmæə, nye bæsiæ læ kasonti læ mɔ ɔflɔ mfo.” ⁴ Læ biyifo nkomæə, nyalæ eni nsusu bua ini bífi béla etiki bílækæ, békpe kabakefe læ betidi nti nɛ?

⁵ Bɛnɔ! Mɔ bayimi lala, Onanto ælækæ bakombo læ kawunsiæ kamfo nkæ bafiani læwɔnɔ eto bakplenyæ læ bofokanɔ æsuæ, læ bænyæ kedikɔ læ wæ sekakedikɔ ka úlækæ utsyæ itæ mba laala wæ. ⁶ Fɛɛ mii, biembu bakombo nya biakpe mæ kafani. Inni batabinyæ bomu laanyinkæ mi kakpe kasɔ? Inni mæ lænæ mi kesuko akpokakpokɔ? ⁷ Nya inni bakplenyæ bamfo laateyi kabua ket-syiko dibu eto diye næ béfi bætækæ mi se bífiani Kristo eto bafokanɔfɔ?

⁸ Læ biyifo læ Onanto eto sekakedikɔ eto kɔfi komæ æsuæ tututu, fe kase báwɔni bakpe læ Awɔnisa Kɛnkɛ eto Kukue æsuæ bæ, “La fæ ɔyimitsyuæ fe fæ æsuæ sekaa,” ete eyifo lesa næ diñyæ itæ nɛ. ⁹ Fɛɛ læ biabe betidi eto ənæmi fæ bieyifo asaa, nyalæ biyifo lebu. Nya kɔfi komæ tsya lélo mi dikpi fe babuayifo. ¹⁰ Utsyuæ saa ke léta kɔfi kɔni ubuu, údi dikpi, óta nyamble kenke ubu. ¹¹ Itsyise nwæ lékpe kɔfi komæ nkæ, “Mankpo kusia nye kusæ.” Wæ ke læteyi nkæ, “Manlo utidi nɛ.” Nyaso læ émendi sɛsɔnɔ fɛ fálo utidii, ete be áta kɔfi ebu. ¹² Nyaso bitæ læ bo etikididi ku bo eyifosa læ ilækæ ete bæ kɔfi ko díta bófo bunsɪ læ bo æsuæ æsuæə, ko kefi

Onanto luufi okpronko bo lekpo tsya nɛ. ¹³ Itsyi læ lekpokpronkpo nɛmɛ əsuə, Onanto embunyə kaminsə kuutsyuə saa wə lænnyə wə utsyuə kaminsə. Fɛɛ Onanto embolo dikpi nwə lænyə wə utsyuə kaminsə.

Biyifo Asa Nnya Laate Bə Bəfo Bɛnɔ.

¹⁴ Mɔ bayimi, læ mi utsyuə nkə okpe bofokanɔ fɛ wə eyifosa lænləkə nnya kate nkoo, nte kutəkə ko uunyə læ nnya əsuə? Wə bofokanɔ bomfo ebofo wə buləkə? ¹⁵ Bifi nnya biə, bayimisani nye bayimisiə bətsyuə kpe ba mfia léla mə læ əsuə nye bəmbə lesa nə looyo mə budi ekemi. ¹⁶ Nte kasɛɛ ka nkpe læ nnya læ mi ɔni átɛyi mə nkə, “Bisu læ diyuə əsuə, mi əsuə læ iyifo krankpa, læ bidi bimi,” fɛ biambɛbɛ asa nnya lefe itə əsuə eto sinə eto nkprəkɛkɛ bitə mə, nte kutəkə ko nkpe læ nnya əsuə? ¹⁷ Nyaso læ bofokanɔ mate kpe utsyuə nya keyifo sa dimankɔ læ mu, wə bofokanɔ bomə eyifo bufufu.

¹⁸ Fɛɛ bətsyuə ebətɛyi bə, “Utidi ɔni kpe bofokanɔ, nya obamba tsya leeyifo keyifo.” Mɔ mbuayɛ ni nkə, “Ləkə ate mɛ kase utsyuə loəkɛ bofokanɔ fɛ weenyifo keyifo sɛɛ. Muuləkə mɔ bofokanɔ nte wə ɛyɛ læ keyifo sɛɛ ka meeyifo əsuə.” ¹⁹ Afo anɔ fə Onanto ɔni ete nkpe? Nko ini sitinti nɛ. Fɛɛ kloma fə awɔnɔ bua tsya áfo banɔ nko, nya baate sikpi, ketinkə. ²⁰ Ɔmumu! Ala fə nləkə nte fə bə bofokanɔ bo keyifo sɛɛ saa dímakɔkoo, eyifo bofokanɔ fufu? ²¹ Ntsyə ibə fɛ bo Ona Abraham díyifo ɔsɛɛ læ Onanto eto ənəmi? Ɔyɛ læ lesa nə úyifo eso nɛ, itsyise úfi wə ubi Isak úsu útəkə læ kedikətəkə eto leba əsuə bə

lè ufi wè utè Onanto kedi. ²² Bènlè bunyè? Wè bofokanò ku keyifo lèkò iyifo lóni. Nya keyifo ka úyifo lèkò nya fè wè bofokanò lèflò bolo nè. ²³ Itè etiki nnya nkpe lè Awónisa Kènke eto Kukue əsua əbè itè bə, “Abraham áfo Onanto ɔnɔ, nya lè wè bofokanò eso, Onanto ákpe wè dibu fe utidi wè ni ɔsɛɛ.” Nyaso Onanto dífi wè fe wè ɔyetsyuə nè. ²⁴ Bíunyə mómɔ! Onanto ənnyə utidi eto bofokanò mate ete kebu wè bə uyifo ɔsɛɛ, wè keyifoyifoyifo ka laakòko mu eso. Nya inni lè kase ófo ɔnɔ eso ete.

²⁵ Nko əmə ke eso Onanto léfo útə Rahab, otsyeto əmə nè. Wè ku Onanto eto nti əbə elèkè eyè lè kase ófo Israelfɔɔ eto batɔnkpe ba laabio kabe asa lè wè diyo, nya ɔwunsəko mə báye kusu bamba bétsyetsyi bédu eso.

²⁶ Nyaso ekpa wuee be fe kase lè utidi eto əsua eyifo lesakpenkpe lè lèwɔnɔ əmbə lè nii, nko ini lè eyifosa saa mankòko, bofokanò tsya ekpe.

3

Bèlè Mì Odiakami Ola.

¹ Mò bayimi, biəntə lè mi nti eto betidi kpə lè bafiani bateasa. Buyi buə bo mba ni bateasaa, Onanto ebokponko bo lekpo kekleke lè diyi nəmə əsua eso utsyuə saa. ² Itsyise bomblè kenke aata kebu. Fè lè utidi utsyuə kpe wè laanta kebu lè lesa nə waatəyi əsua nyalè utidi əmfo aflò nya waafò wè əsua kenke tsya bələ kukɔnɔ. ³ Boefi situ kakle ɔtómimi eto kényè bə lə utsyue bo koto bə lə bɔyenko wè busuko kaka kee boala. ⁴ Bibu ɔklò kplè wè ufiebi kplè laafò se bukə kayenko lè lekpo əsua, fè wè ɔyenkoyi kəkè ete laaka wè

kayenko. Nya baaka wə kayenko kesuko kaka kee okanka əmə lela nkə weesuko ko. ⁵ Nko ke ini odoakami tsya nɛ. Ite bə ɔfɛ tinti lə etidisuə kəmiə tsyaa, wə əsuə utidi laayɛ kabesə əsuə kato lə eyifosa kplɛ əsuə nɛ. Bebe kase ini bə ute eto odiakami kɛkɛ te lətə kusəmbia kplɛ ləənyə ute kaato.

⁶ Nko seka odiakami tsya nte fe ute nɛ. Uyifo fe kawunsiə ka diyi ku lebuə eto asa nnya nkpe lə bo lə əsuə eto sinə nti. Woanansə əsuə eto uyi əmə kenke nya woatsylɔsə bo nkrəsiəsə. Fɛɛ wə kosate, ute manlo kosate laato ute kakpe lə wə nya woanyə lə bo əsuə flaflafla. ⁷ Utidi áfo bebutubuki buyuəsə, nya wəətsyə mba tsya nkpe sisenle ku baklɔbɛ ku mba laakpii kasɔ ku akpɛ ku abamba kenke. ⁸ Fɛɛ kuutsyuə saa mámfo tɔ odiakami eto nkrə buyuəsə. Uyifo obuəle wə bəmbofo binyinkə kakpe, wə diyi ku keni ka laalo utidi fe owa eto keni. ⁹ Boefi wə katesə Bonamute ku Boanto Onanto. Boefi wə kekudi bo bayimitsyuə, utidi wə beyifo lə Onanto eto ditsyəbi əsuə. ¹⁰ Aninsɔtiki ku ekuditikii, nyamblɛ aabɔ ketsyi lə kɛnyɛ kamə ke əsuə. Mɔ bayimi, yanle bə nyamfo tsyə nko nkrə. ¹¹ Ditubiə kuditsyuə aanyifə ntu bo nkpe kamini kesi kaayifə mbo nkpe mba. ¹² Mɔ bayimi, kototsyabi ebofo lɛbesi bɔnwɔ? Nye aketekubi eto ukue nwɔ kototsyabi eto awɔnsa? Nko ke ditubiə nə laayifə mbantu ləmbɔfo ntu bo nkpe kamini bɔyifə tsya nɛ.

Onanto Eto Kobe Itə Utidi Aabokosə Isuə Kasɔ.

¹³ Owoe ni obesibe ku nwə laanɔ asa kasɔ lə mi nti? Ufi nkpəsiasə sɛɛ uləkə nyamfo ote lə wə eyifosa əsuə, nya uyifo nnya ku əsuə kasɔ bokosəbokosə ku lə kobe əsuə. ¹⁴ Fɛɛ lə mi ketu kəmiə biasəsə ənəmi lə asa əsuə, lefonyi nkpe mi, nya mi nti eto utsyuə saa laabɛɛ wə mate eto lələkəsə, biantɛyi sidia bela ɔnukualɛ kɛnyɛ, bifi mi bebesə əsuə kato biə biyi kobe. ¹⁵ Kobe komfo eto okle mentsyi kato, bomu kawunsia mfo eto kole kuni, kunni nko nyɛ lə ləwɔnɔ sɛɛ əsuə bomu nko nyɛ lə ləwɔnɔ bua əsuə. ¹⁶ Itsyise kaka kutsyuəsɛ kpɔnkpɔ ku mɔ hã eto ale lə ɛlɛkɛ nkpee, kənə ku asa buayifoyifo saa eto okle hã laakɛ mfo. ¹⁷ Fɛɛ tutɛɛ, kobe ko ditsyi kato akpa, kuyi ku diyuə, disuətsyuə ku sɛyɛmitsyuə kasɔnɔnɔ, kuyi ku kaminsənyənɔ, nya koawɔ ebibi sɛɛ. Koannla ntisensense lə betidi əsuə, nya bətsyuə mamfokanɔ ku kawɛ saa anke lenti. ¹⁸ Betidi ba laakpla bətsyuə nti, kənə diyuə kaboko lə betidi ntii, aato eyibibi nnya eto awɔnsa ni nkpə sɛɛ siəsia.

4

Ele Bə Bebokosə Isuə Kasɔ Bitə Bonamute.

¹ Be ləənə amakpɔnkpɔ ku niə kakpe mi lenti? Yeetsyi lə mi kənənsɛ lə nkpədidi eto alasa nnya nɛ mi bɔkpɔnko lə kəmiə lefe saa əsuə. ² Biabɛɛ kawunsia eto bikə, fɛɛ biəmbofo mi bɔkɛ. Nyaso bialo bətsyuə. Biabɛɛ asa kekleke, fɛɛ biamfo nnya bunyə, nyaso biədiə niə kakpɔ bətsyuə. Biankɛ lesa nə biabɛɛ, itsyise biantɔ Onanto biə utə mi nnya. ³ Nya lə bɛtɔ Onanto asa tsyaa, biamfo nnya, itsyise biantɔ nnya ku

nsusu sɛɛ, biatɔ asa kɛtɔ mi ɛsuɛ mate. Asa nnya biufi bekpe ɛsuɛ disuɛyuɛ hã biatɔ. ⁴ Biyifo betidi ba lendi ɔnukuale! Binyi biɛ mba difi mɛ ɛsuɛ beyifo sɛyɛtsyuɛ ku kawunsiɛ kamfo eto nkrɛdidi eyifo Onanto eto balo? Nyaso fɛɛ kɛ lɛla fɛnkɛ ɛlɛkɛ kawunsiɛ kamfo sɛyɛtsyuɛ, ɛfi fɛ ɛsuɛ ɛyifo Onanto eto olo. ⁵ Biembu biɛnkɛ ɔnukuale ɛmbɛ lɛ Anantotiki nnya lɛtɛyi nkɛ, “Lɛwɔnɔ nɛ Onanto dɛfi ɔkpe lɛ boo, eyifo lɛwɔnɔ nɛ laakpɔ sitsyuɛɛ kekɛkɛ lɛ bo disi.” ⁶ Fɛɛ Onanto eto lefonɛ nɛ wɛtɛtɛ boo, kpe ale lesɔ kulaa. Fe kase Awɔnisa Kɛnkɛ nyamɛ lɛtɛyi nkɛ, “Onanto ɛɛnyɛ lɛ mba laabesɛ ɛsuɛ kato ɛsuɛ, fɛɛ wɛtɛtɛ wɛ lefonɛ mba laabokosɛ ɛsuɛ kasɔ.”

⁷ Lɛ nyasoo, bebokosɛ ɛsuɛ kasɔ bitɛ Onanto. Biɛnyɛ lɛ Obonsam lɛ ɛsuɛ, ete wuutsyɛtsyi udu lɛ mi ɔflɔ. ⁸ Bɛyi bɛfi Onanto, ete wuutsya ebɔyi ɔfi mi. Biflɛ mi ani, mi mba ni babuayifo. Biflɛ abua bilɛkɛ lɛ mi akɔɛsi, mi mba eto nsusu laafloma lɛ bofokanɔ ɛsuɛ! ⁹ Binyɛ kanyi lɛ mi akɔɛsi, bɛfa bembembe, biwu keku. Bɛfloma mi simɛmɛmɛ lɛ sefiani nkuwuiwui, lɛ mi disuɛyuɛ lɛ diyifo kpɔminii. ¹⁰ Bebokosɛ ɛsuɛ kasɔ bitɛ Bonamute ɛmɛ, ete woobesɛ mi kato.

¹¹ Mɔ bayimi, biendi ditiki nɛ diɛnyɛ itɛ lɛ mi bɛtsyuɛ ɛsuɛ. Nwɛ laatsyi wɛ ɔyimitsyuɛ ditiki nɛ dimatsyɛ nye ditiki fimfi, nye laakpoko wɛ ɔyimitsyuɛ lekpo, aatsyi ditiki nɛ dimanɛkɛ iɛnyɛ lɛ kɔfi ɛsuɛ, nya waakponko kɔfi komɛ lekpo. Lɛ kɔfi komɛ faakponko lekpo, nyalɛ ɛmɛnyifo nwɛ leeyifo lɛ kɔfi ɛsuɛ, bomu ko okponkpo feni. ¹² Onanto hã ni nwɛ laakpe afi nya uni okponkpo tsya. Wɛ hã lofo bofo kɛtɛ

utidi nye otsylɔsə wə tsya. Owoe feebu fə wə feni fə faakpronko fuutsyuə lekpo?

Mambesə Ɔsuə Kato.

¹³ Mɔmɔɔ, bitsyue koto bɛnɔ, mimba laatɛyi biəkə, “Mmi nye kusɛɛ, buusu kusu umə nkplɛ utsyuə nya budi fe lɛlɛ lɔni mfó, buuyifo nyifo bɔkɛ atabi kpenkpe.” ¹⁴ Biyi lesa nə luubə kusɛɛ? Mi nkprə te fe kuyuə ko laabɔ itə lefe kliminti, kesinkli kanya. ¹⁵ Lesa nə ele bə betɛyi ni bənkə, “Lɛ Bonamute atɔnɔ bonkpe nkprə, buyifo nəmfɔ nye nəmə.” ¹⁶ Fɛ mɔmɔɔ, biaka kase kabesə əsuə kato. Ɔsuə kato bobesə bomfo kenke manlɛkɛ.

¹⁷ Lə nya esoo, nwə ke nyi lɛsɛ ele bə uyifo fə ɔni weenyifo nii, aata kebu keyifo lebua.

5

Atokəkə Itə Batabinyə.

¹ Nya mɔmɔɔ, mi batabinyə bɛnɔ! Biwi nku bɛsɔ ani kɛnyɛ lə bulə kplɛ bo ləəbə mi butu əsuə. ² Mi betabikə ábia nya balɛ dídi mi awu ku mfia bábiasə kenke. ³ Mi sika sia kɔ sika flubia áto nkanda nya nyamfo luudi sedansie inyə lə mi əsuə nya yotonsə mi əsuə eto sinə fe ute seka. Bɛbɛbɛ bikə bińyənsə léto lə eyi fɛfɛ nyamfo. ⁴ Bebee! Beyifoyifo ba díyifo keyifo bətə mi lə kakusɛ, bɛni bíamfo mə nyo. Bidi kaa bɛnɔ kase banlɛ mmínsəku buwui bembembɛe! Nya mba dífəsə bɛkuenkɛ bətə mi fɛ bɛni bíamfo mə nyo eto kudu díkayo Boanto Onanto Ɔkplɛnyə əmə eto kotoo. ⁵ Mi nkprə bo binsi lə kasɔ mfo eyi ku nkprədidi ku disuəyuənyənyə sɔ̃̃. Nya bíyifo mi

əsuə bísia ayinkua itə diyi nəmə itə bolo. ⁶ Bélo betidi ba dímantə mi bebu dikpi, nya bélo mə lə lefe nə bántaka bənyə mi lə əsuə kulaa tsya.

Bekpe Utu Buɛɛ, Bińyə Bisəkə Bonamute Ɛmə Eto Bubə Bio.

⁷ Nyaso, mə bayimi, bifi disuətsyə lə bekpe utu buɛɛ bińyə isu ese lefe nə Bonamute əmə luubə bio. Bebe kase ɔkuɛmfo nkpe disuətsyə! Bebe kase woəńyə buɛɛ kəsəkə bekuɛnkə kpenkpe bia wəəbə bunyə ketsyiko lə wə kasɔ, nya wəəńyə buɛɛ kəsəkə ɔsɔmi eto bɔni lə lefe sɛɛ əsuə. ⁸ Nko ele bə mi tsya muə utu beɛ nɛ. Biəntə lə ani elo mi, itsyise Bonamute əmə eto dibəfe bio eboyo elo.

⁹ Mə bayimi, biəndiə niə lə bətsyuə, bə lə Onanto lə ɔyɛ mi lekpo bokponko. Itsyise okponkpo əmə eto bube bɔfi. ¹⁰ Mə bayimi, bekloma Onanto eto bənyɛləkətidi ba lébe ditiki nə mə letsya lə Bonamute əmə eti diye əsuə. Bitə lə bobə kase bənyə kanyi nya bəmuə utu balɛɛ, lə bokase asa lə nnya əsuə. ¹¹ Boakpo betidi bamba boə mba bakpo atsyɔ, itsyise bənyə bembə lə kanyi əsuə. Biɔnɔ kase Hiob dímuə utu ɔɛ ku kase Onanto léfo wə nnya layo lə kalosəkɔ. Itsyise Bonamute kpe kəfoɛkpe nya woənyə utidi kaminsə.

¹² Mə bayimi, ditiki kekleke nə mɔɔtɛyi mi ni bənkə biankpadi asa, kato keni o-o, kasɔ keni o-o, nye lesa bamba saa dini o-o, biankpadi. Lə ditiki nəmə kpee, bɛtɛyi biə ee. Nya lə dimbəə, bɛtɛyi biə oowo, lə Onanto lə ɔyɛ mi dikpi bolo.

¹³ Lə utsyuə kpe lə bulə əsuə nye ɔnlɛ kanyi bunyə lə mi ntii, oto ola utə Onanto. Lə utsyuə

le disuəyuə bunyəə, usə atəsə eto əsə. ¹⁴ Lə mi nti eto utsyuə le bufii, bekpadi bafokanɔfɔ eto ditsyukpa eto beninə lə bato ola lə wə disi, lə bediki wə nuəbi lə Bonamute eto diye əsuə. ¹⁵ Ola wə báto lə bofokanɔ əsuə əbotsya ufunfi əmə, nya Bonamute lootakase wə, nya lufi wə abua ɔtsyɛ wə. ¹⁶ Nyaso biləkə mi abua kasɔ bitə bətsyuə lə beto ola lə mi bətsyuə eto disi lə binyə bufitsyantsya. Utidi sɛɛ eto olatoto kpɛ əsuəale nya weeyifo keyifo tinti. ¹⁷ Elia éyifo utidi fe kase bo tsya ni. Se óto ala kekleke nkə ɔsɔmi yɛ bɔnii, óyɛ bɔni lə alɛ ətsyə ku kutsyə əsuə sɔ̃ɔ̃. ¹⁸ Lə nnya kamaa, usi óto ola, nya Onanto díte ɔsɔmi leni nya bidikə lələkɛ lə kasɔ kamə.

¹⁹ Mɔ bayimi, lə utsyuə əbə kama lə ɔnukualetiki nəməə, beklatsya lə beekpa wə beboko, ²⁰ bekloma biə utsyuə saa ke lookpa obuayifo utsyiko lə kabuayifoyifo əsuə obokoo, wuutə obuayifo əmə nyə nkɔpə ku abua kpə nnya úyifo eto bufukatsyɛ.

Onanto eto kakle ɔɔɔ; Sɛkpɛle
Sekpele: Onanto eto kakle ɔɔɔ; Sɛkpɛle New
Testament

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

5fc03d2a-3cf8-5607-a6e0-9e1e197140bd